

مقاله ساخره

خسبه

كريم محمد



© مجتمه حروف

خمسينة

مقالات ساخرة

كريم محمد

جميع الحقوق محفوظة ©مجتمع حروف

[www. 7r oof . com](http://www.7r oof . com)

خمسينة : مقالات ساخرة

المؤلف : كريم محمد

Ai r mast er 2011 @hot mai l . com

تصميم الغلاف : محمد سعد

صفحة مصمم الغلاف : behance. net / 7r oof

تصميم اللوحات الداخلية : العبد لله

نشر في : يونيو 2014

خمسينة هو كتاب يريد أن يصفى ذهنك من أي شوائب ،
كتاب تعتبره كالشاي في الخمسينة يروق دمك و يخفف
عنك مصاعب الحياة ...

إهداء

إلي الحج و الحجة ..

إلي كباية الشاي الثقيلة ..

إلي الشيخ إمام و صنع الله إبراهيم ..

إليك أيها القارئ ..

بسم الله الرحمن الرحيم

الكتابة الساخرة من أندر أنواع الكتابة ، يعني أنت ممكن تلاقي 50 واحد بيكتبوا في الأكشن أو الخيال العلمي أو الرعب ، لكن لو دورت كويس هتلاقي 6 بس بيكتبوا في الأدب الساخر في دولة واحدة ..

الكتابة الساخرة مش سهلة ، مش كل من هب و دب يكتب نكتتين و يقول أنا بكتب أدب ساخر ، بالنسبة لي الكتابة الساخرة هي أصعب أنواع الكتابة ، لأن القارئ يكون متعشم أنك تكون خفيف الدم ، تخفف آلامه بكام كلمة حلوين ، و ياويلك لو طلع دمك ثقيل ، هتتشتم و تنهز من القارئ اللي إتصدم فيك ..

في هذا الكتاب الذي بين يديك (أو بين ملفات الكومبيوتر علي حسب جهة نشر الكتاب) يضم مقالات (

ساخرة) (وضعت كلمة ساخرة في قوسين لأنني لا أعرف
هل هي ساخرة حقاً أم دمهها ثقيل ، فالرأي في النهاية
رأيك أنت) كتبت في فترات متقاربة ، تحتوي علي
ذكريات حلوة و مرة مرت علي العبد لله ..

لن أنسي أن أقول لك أنك أحد المجموعتين .. مجموعة
قرأت كتابي الأول (حقناً للدماغ) و مجموعة آخري تقرأ
هذا الكتاب دون أن تعلم شئ عن مؤلفة ..

و في النهاية ، أتمني أن يكون هذا الكتاب خفيف الدم
يمر عليك مر الكرام و يترك في عقلك بعض منة ، و لا
أتمني أن يمر عليك ثقيل الدم تتمني أن تنهية في أسرع
وقت ...

المؤلف الغلبان

خُشُّ بِرَجْلِكَ الْيَمِينِ ...

يُخْشَى



يوم من حياة طالب مصري

الحصة الأولى : أحياء

تدخل مدرسة الأحياء الفصل ، الجميع ينتظر بفارغ الصبر ذلك الدرس ، الدرس الذي يفهمك أنك أصبحت كبيراً و يجب أن تعرف تلك الأشياء ، البنات تجلس في خجل يتوقعون ما سيسمعونه ، و الأولاد يجلسون في تلهف ينتظرون بفارغ الصبر أن تبدأ المدرسة بالشرح ، و لكنها تجلس في هدوء و تقول في مرح :

- علي فكرة ، الدرس بتاع النهدا إتلغي من المنهج .

!.....

الإمتحان

س1 : أذكر عدد الخلايا الأكتوبلازمية في جلد أنثي

الضفدع ؟

س2 : أذكر عدد شعر رأس مواطن مصري (بشرط ألا يكون حجاج عبدالعظيم) ؟

الحصة الثانية : تاريخ

حين تولي الإسكندر الأكبر البلاد في 520 ق.م. عاشت مصر في أزهي عصورها ، كانت عصور زي الفل ، قام الإسكندر الأكبر بزراعة طحال و كبد في عام 519 ق.م. و بعدها بسنوات قام بالتعاقد مع شركة Teadat a علي وصلة نت و شراء (راوتر) ، و في عام 515 ق.م. قام الإسكندر بتغيير ام الإسكندر بتغيير إطارات العجلة الحربية بتاعتوا .. بعد وفاة الإسكندر تم تقسيم البلاد التي حكمها علي مساعدية و كانت مصر من نصيب (بطليموس الأول) (أمة كانت داعية عليّة) ..

الإمتحان

س1 : أذكر العام الذي تم فيه تعيين مدرسة التاريخ
بتاعتك ؟

ج : عام أسود .

س2 : أذكر آخر كلمات قالها الإسكندر قبل وفاته ؟
ج : كووة كووة (كان بيكُح) .

الحصّة الثالثة : لغة عربية

يقول عنتر بن شداد في هاشتاج لة علي تويتر :

"و لقد نزلت فلا تظني غيرة

مني بمنزلة المحب المكرم

هلا سألت الخيل يا بنة مالك

إن كنت جاهلة بما لم تعلمي"

تفسير النص :

يقول عنتره لعبلة أنه مل منها و من تسلطها و مازال
يذكر تذررها في المصيف الماضي في "بورتوسخنة" و
يقول في (و لقد نزلت) أنه نازل إلي زوجته الثانية في
التجمع الخامس و يقول لها في (فلا تظني غيرة) :
ماتغيريش عليا عشان الشغل دة بقي بلدي أوي .
و في قولة (المحب المكرم) يقول : أنه أشتري لمراتة
الثانية شقة في عمر مكرم .
(هلا سألتني الخيل) : يطلب عنتره من عبلة أن تسأل
الخيـل و يدل ذلك علي أن عنتره كان عنده برج ضارب .
(يا ابنة مالك) : يذكرها بوالدها مالك بن قراد عشان
يعايرها (أصل مالك السنة اللي فاتت إشتري سهم في
البرصة و خصر تحويشة العمر) .

(إن كنت جاهلة بما لم تعلمي) : يذكر عبلة بأنها كانت (دبلوم صنایع) .

الإمتحان

س1 : أذكر أسم الشخص اللي لف لعنترة السيجارة قبل ما يقول بيتين الشعر دول ؟

س2 : ماذا فعلت عبلة حين سمعت البيتین ؟

ج : رفعت قضية خلع في محكمة الأسرة .

الحصّة الرابعة : كیمياء

س1 : أذكر فواءد الصودا الكاوية ؟

ج : بنلّسع بيها بعض.

فسحة

شعار الفسحة المشهور : فسحة فسحة عم خليل الأزعة .

في الفسحة ينقسم الفصل إلي عدة أقسام ..

(1) قسم بيروح الحمام (أدي إلي إنسداد مجارة
المدرسة 78 مرة)

(2) قسم بيروح يظبط (أدي إلي إنتشار حالات
الزواج العرفي)

(3) قسم بيروح يحسد القسم اللي بيظبط (أدي إلي
فشل نصف حالات الزواج العرفي)

(4) قسم بيروح الكنتين (أدي إلي إستنزاف مرتب
الأب و نعنشة جيب صاحب الكنتين)

الحصة الخامسة : ألعاب

هي الحصة اللي بيذلونا بيها عشان نحبي العلم الصبح ،
و لو أخذناها بيبقي مفيش كورة ...

الحصة السادسة : تربية وطنية

مادة ملهاش أي لازمة (علي أساس أن المواد اللي فاتت
كان ليها لازمة) .. المدرسة تدخل و تتكلم عن إنجازات
الحكومة و خلاص .

الحصّة السابعة : مجالات

- 1 - صناعة : الحصّة اللي بتتحول فيها من طالب إلي
نقاش/كهربائي/سباك .. المدرس بيستخدمك عشان
تصلح أي حاجة بايظة في المدرسة و خلاص .
- 2 - زراعة : جلايتك .. جردلك .. فأسك .. و أزرع يا
معلم .
- 3 - مكتبة : أمينة المكتبة تقول لنا كلمتين عن العقاد و
بعد كدة تأمرنا نرتب المكتبة (ماشيا بمنطق من
علمني حرفاً صرت لة عبداً طالع حباب عينية)

الحصّة الثامنة : فيزياء

$$\mathbf{J} = \mathbf{F} \Delta t$$

$$\mathbf{J} = \int \mathbf{F} dt$$

لا تعليق ...

إحنا أسفين يا صيف



إحنا آسفين يا صيف

لا أعرف إذا كنت تقرأ هذا المقال في الشتاء حيث تجلس
بجوار البوتاجاز - اللي جواة بطاطا طبعاً - و في يدك
كوب كاكاو ، أو إذا كنت تقرأة في الصيف حيث تجلس
بالملابس الداخلية بجوار التكييف و في يدك (لوح ثلج)
و تقرأ المقال ..

و لكنني أريد أن أخبرك أنني أتجمد هنا برداً ..

إلي كل من تأفف من العرق في الصيف و حزن لأن مزيل
العرق إنتهي في يوم ذو درجة 42 ..

إلي كل بائع فاكهة (بيرش) مياة أمام بضاعته لتخفيف
درجة الحرارة و الصهد اللي خارج من الأسفلت ..

إلي كل شاب حط راسة تحت الحنافية بعد ما دخل
البيت علي طول و غرق هدومة و أمة (طبعاً) هزقة ..

إلي أي ابن محظوظة شغال في سوبرماركيت مكيف ...

إلي كل طفل حط شوية ثلج في قفاة من الحر ..

إلي كل واحد حلق شعرة في عز الحر و كان لا يص في

الشعر اللي في قفاة (طبعاً لو أنت أنثي يبقى كنتي عن)

جون) الكوافير تحت التكييف و إحنا طبعاً كنا عند عم)

فتحي) اللي مش مشغل غير مروحة ستاند و موجهها

ناحية الحيط) .

إلي كل الناس دي أحب أقول ، حرام عليكموا ، طلمتوا

فصل الصيف ، و بالنيابة عن الناس دي كلها أحب أقول ..

إحنا آسفين يا صيف ..

إمضاء/واحد عنده برد

(ملحوظة : حد بعاة بنديل)



عيد حب بالجنة المتبلة

عيد حب بالجينة المتبلة

هو النهردا كام ؟ بدأت أفكر في السؤال العويص دة ،
صحيت الصبح لمحت جاري في العمارة اللي قدامي
قاعد مع مرانة و في إيدي عصير برتقال و هاتك يا
ضحك ، و جمبهم دبodob أحمر في حجم فيفي عبدة ..
الفيس بوك أتحول في ثواني إلي من اللون الأزرق إلي
اللون الأحمر ..

في إية يا جماعة ؟

النهردا عيد الحب يا أستاذ !

رد عليا صاحبي و قال الجملة دي ، عيد الحب ؟ النهردا
عيد الحب ؟ و بدأت أفهم سبب اللون الأحمر و الدباديب
اللي في حجم فيفي عبدة ، طب أنا مالي و مال عيد
الحب ..

قعدت أفكر إزاي أعمل أي حاجة عشان أنسي الموضوع
دة ، و علي ما اليوم خلص ، قررت أجيب هدية لحبي
الأول و الأخير .. الكنبه ، جريت عليها و أخذتها في
حضني ..

<< كل سنة و أنت طيبة يا طاهرة >>..

قعدت علي الكنبه بتفرج علي التلفزيون و بقضي عيد
الحب مع الكنبه و كيس شيبسي بالجبنه المتبله في إيدي
..



لغة کوکب زحل



لغة كوكب زحل

هناك من يغلطون بين اللغة العربية و اللغة الإنجليزية
بطريقة كوميدية تصل إلي (المسخرة) ..
و هناك من يدمجون بين الإثنين عن غير قصد ، و هناك
هؤلاء العباقرة -الذين سأتكلم عنهم الآن- من يدمجون
بينهما عن قصد ، و تجدهم بعد فعلتهم الشنعاء هذه
يبتسمون في بلاهة و فمهم مفتوح من تلك الأذن إلي
الأخري و كأنهم يقولون لك << سيباوية يتكلم معك >> .
..

بصراحة .. و بدون أية مبالغة في الموضوع ، أنا شايف
الناس دي (متخلفين) ، لأنني لما يبدأ الحوار معاهم
مبفهمش حاجة ، هما كلمتين عربي علي إثنين إنجليزي و
تلاقي نفسك في الآخر زي الأطرش في الزفة ..

كان في مدرسة بتدرس لنا ، هي من أوحى لي بفكرة
المقال دة ، لما كنت أسألها سؤال في المنهج ، كانت
تقول لي أكتب لي السؤال في ورقة و سبها علي المكتب
و أنا ه Answer هولاك بإذن الله .. حسيت أن وداني
طولت و إن طلع لي ديل .. قعدت أفكر لحد ما فهمت أن
اللي قالتة دة يعتبر (كلام بني آدمين) ..
مثال آخر ..

قالت لزميلة لنا ذات مرة : أنا شفتك و أنا ب Pr ayi ngu
صلاة العيد اللي فات .

ثم تقول لآخر : عجبتي الصورة اللي أنت shar eتها
إمبارح .

و لآخر : المفروض ت Respect المدرس بتاعك .

يا ريت حد يقطع لسانها أو يفهمها أن اللي بتقوله دة
مش لغة موجودة علي كوكب الأرض ، دي لغة هتلاقيها
علي كوكب زحل ..

لا تخبروا
الكبار



لا تخبروا الكبار

رغم أنني الآن كبرت -إلي حد ما- فمن العار أن أشاهد (الكارتون) .. لأنهم سيقولون لي : هذة أشياء الصغار ..
لقد كبرت الآن و يجب أن تشاهد معتز الدمرداش و مني الشازلي ..

و لكني مازلت أعشق الكارتون ، هو بالنسبة لي كالماء و الهواء ، قررت أن أنتظر حتي ينام الجميع ثم أفتح قناة سبيس تون و أمتع نفسي ببعض الكارتون ، و أتذكر حين كنت صغيراً كيف كنت أشاهد في البداية عالم سمس ثم تطور الأمر مع ظهور الدش و قنوات الكارتون ..
يستيقظ أبي فأغير المحطة سريعاً ، أتنهد في نفاذ صبر ثم أخلد إلي النوم ..

و حين أذهب إلي خالي أري أطفاله الصغار يشاهدون الكارتون ، هنا أجد الفرصة المناسبة فأصنع اللعب معهم و لكن في الحقيقة أنا أشاهد الكارتون ، لا تسخروا مني ، فأنا أعرف (رجالة بشنبات) يشاهدون الكارتون مثلي إلي الآن ..

إنه يخرجك من أحزانك و همومك و مشاكلك ..

علي أن أنهي هذا المقال الآن ، فقد حان موعد كارتون المحقق كونان الآن ، و لكن تذكروا شئ ، لا تخبروا الكبار أنني أشاهد الكارتون ، فلنجعل هذا سراً بننا !!



فلسفة القطط

حقاً إن للقطط فلسفة خاصة ، لم أفهمها حتي بعد أن
كبرت ، أذكر حين كنت في العاشرة من عمري و كنت
عائد في يوم من المدرسة ، وجدت قط يجلس علي
السلم يموء في (مسكنة) ..

حزنت لأجل القط و أحضرت لة بعض اللبن في طبق
صغير ، فبدأ القط يشرب في شراهة ، و بعدها قالت لي
أمي : أنة لن يتركني و سيظل يتردد علينا حتي نعطية
اللبن .

لم أصدق كلامها آن ذاك و ظننت أنها تمازحني ، و لكن
حين عدت من المدرسة في اليوم التالي وجدت القط
يجلس علي السلم كأسدي قصر النيل ينتظر مني (
الإتاوة) و لكنني أشحت بنظري بعيد و كأني لم أراة ..

ظل يأتي كل ليلة في تمام التاسعة ، يجلس علي السلم
يموء بصوت يحمل نبرة << فين اللبن ياض >> و يظل
يموء حتي منتصف الليل ...

تحولت حياتي بسبب القط إلي جحيم ، أصبحت أكرة (
توم) الذي كنت أتعاطف معه ضد (جيري) ، أصبحت
أكرة اللبن و السمك ، فقط لأنه يحبهم ، الآن فهمت
فلسفة القطط ، يأتي إليك و يظهر لك الوجه الوديع
حتي يحصل علي مرادة و بعدها يتحول إلي قط ابن
70*60 ...

بعد ثلاثة أسابيع لم يظهر القط مرة أخرى ، لعله مات
بسبب الجوع ، أو تم تحويله إلي وجبة في أحد مطاعم
إمبابة ، في اليوم التالي رأيت فأر يجري علي ماسورة
المجاري ، فأسرعت إلي الثلاجة و أخفيت كل الجبن لكي
لا يرق قلبي للفأر ...



أن تكون مصري

أن تكون مواطن مصري هو شئ عظيم جداً ، لأن
الجنسية المصرية بتتيح لك مميزات مش هتلاقيها عند
أي جنسية ثانية ..

* إذا إشتراكك في برنامج تليفزيوني للكشف عن
المواهب .. الناس لما تصوت هتصوتك تعاطفاً معاك
عشان أنت مصري .

* من المميزات المصرية العريقة أنك بتحس الدفء
العائلي في إشارات روكسي و غيرها .

* محدش هيقدر يسألك أنت ماشي بتكلم نفسك ليه في
الشارع ، يكفيك أنك تقول أنك مصري (واحد صاحبي
عمل كدة قام الراجل مكرمش لة 5 جنية في إيده)

*الجنسية المصرية لا تتيح لك العمل في أي جهة حكومية إلا بواسطة .. و الجنسية المصرية لا تتيح لك الواسطة إلا لو كنت ابن الناس .. و الجنسية المصرية لا تتيح لك أنك تكون ابن ناس أصلاً.


*الجنسية المصرية بتتيح لك توطيد صلة الرحم مع أبناء الوطن من الضباط (قانون الطوارئ)

*الجنسية المصرية هي الجنسية الوحيدة اللي هتاخذ عليها هدية إسمها (متلازمة ستوكهولم)

(متلازمة ستوكهولم ,

هو مصطلح يطلق على الحالة النفسية التي تصيب الفرد عندما يتعاطف أو يتعاون مع عدوه أو من أساء إليه بشكل من الأشكال،

أو يظهر بعض علامات الولاء له مثل أن يتعاطف
المخطوف مع المُختَطِف .)



بالأمس حلمت بـ "شنب"

كنت في العاشرة من عمري حين رأيت شارب فرائ
المدرسة .. شارب كث ضخم قد تستعمله لكي تضع عليه
حقائبك بدلاً من حملها !

يمشي الفراش متباهياً بشاربة و كأن (ليوناردو
ديكابريو) خو الجالس تحت أنفة و ليس شارب عادياً ..
يبرم شاربة من حين لآخر كـ (أحمد عرابي) ..

حلمت بشارب كهذا و أنا صغير .. كم نظرت إلي أسفل
أنفي في المرأة أحوال أن أضحك علي نفسي و أقول
أنني أري بعض الشعر .. و لكن خيبة الأمل كانت النتيجة
الدائمة مع الصحراء الجرداء تلك أسفل أنفي .. أضع
الصابون علي ذقني ، ثم أمسحة بورقة مقواة و كأني
أحلق ذقني و شاربني (الله الكلام دة حقيقي !!)

كنت أسأل والدي : بابا أنت بتحلق دقنك لية ؟ ما تربية ؟

فيقول لي : الجو حر .. هي ناقصة دقن ؟!

فأقول لة في يأس : حد طایل !

و بعد مرور السنين .. أنظر الآن إلي شاري و ذقني
النابتين .. أحلقهم في ملل و أقول : هي ناقصة شنب في
الحرمة ؟!

فقد تحول الشنب بالنسبة لي إلي عذاب يومي ...

(هذا المقال برعاية عم سعيد الحلاق اللي علي أول
الشارع !!)



5 جنية

أهبط علي السلالم في هدوء لكي لا أزعج جيراني ،
أخرج من باب العمارة و رائحة قط نصف متعفن تملأ
أنفي و لا أعرف مصدرها .. أين أذهب ؟ ..

أنا ذاهب لأحد أصدقائي و النوم لم يفارق عيني بعد ..
أقف علي أول الشارع أنتظر ميكروباس .. أضع يدي علي
جيبتي لأتأكد أنني لم أنسي الموبايل كعهدي (في يوم من
الأيام حين أتزوج سأكتش أنني نسيت أحد أطفالي في
مكان ما و نسيتة) ..

أضع يدي في جيبتي الآخر .. تباً .. لقد نسيت المحفظة ..
ما أملكة الآن هو 5 جنيهات عمي لا تكفي رشوة لأمين
شرطة .. هنا وقف أمامي ميكروباس فأسرعت بركوبة ..
بدأت أحسب كم ستكلفني رحلتي ..

1 جنية : ميكروباص (رايح جاي)

1 جنية : ساندوتش فول

6 جنية مستلزمات البيت

هنا قلت لنفسي : بلا مشاوير .

<> علي جمب يا أسطي <>

قلتها لتجلجل في الميكروباص ، ثم ترجلت منه و قررت
أن أعود إلي البيت لأكمل نومي ...

(ملحوظة : حين وصلت إلي الشقة و بدأت في تغيير
ملابسي إكتشفت إن المحفظة كانت في الجيب الوراني
من البداية !!)

منير و حميد والأيام الخوالي



منير

منير و حميد و الأيام الخوالي

كنت في التاسعة من عمري ، طفل في مهب الريح يرتدي
تيشرت صيفي و شورت جينز و في يدة مصاصة كبيرة ..
الجو حار و ممطر .. المطر هنا لين من السماء بل عرق من
كل مكان في جسدي .. و رائحة جبنة قريش قادمة من
مكان ما ..

هذا هو جو السفر إلي المنوفية .. بلدي الحبيب و مسقط
رأسي و الجرح اللي ما بيخفش أبداً .. ركبت في السيارة
و معي أختي و أمي بعد أن ودعنا أبي و ترك لي مهمة >>
راجل البيت << .. جلست و الشمس تقتل (قفايا) و أنا
أتمني أن نصل في أسرع وقت ممكن .. هنا جاء الصوت
من مكان ما ..

>> عيون .. عيون .. عيون .. كل العالم عيون <<

نسيت الحر تماماً .. و غرقت في صوت منير الرائع .. آن
ذاك لم أكن أعلم من هو منير .. و لم أكن أعلم أسم
الأغنية .. ظلت في بالي (الأغنية اللي سمعتها في
العربية في اليوم الفولاني) .. و لحسن الحظ .. كان
السواق قد أعد شريط كاسيت يحمل أغاني ل(منير و
دياب و حميد الشاعري) ..

شعرت بنسمة هواء .. لم أعلم أهي بسبب الأرض
الزراعية التي بانت في الأفق أم بسبب صوت دياب الذي
إنطلق في السيارة ..

<< رصيف نمرة 5 و الشارع زحام >> ...

كان حلم حياتي آن ذاك أن أعرف أسماء تلك الأغاني .. و
أسمعها طوال الطريق ..

حين وصلت السيارة إلي الموقف كان حميد قد فرغ من

أغنيته >> هو انتى من باقى البشر ولا انتى من اهل

القمر

انا عيني عشقت طلتك بيدق قلبى فى طلعتك << حزنت

كثيراً حين جاءت لحظة الفراق (إية الأفورة دي) رأيت

السواق و هو يخرج الشريط من الكاسيت .. تمنيت لو

أحصل عليه .

تذكرت تلك الأيام الخوالي و أنا أسمع تلك الأغاني علي

موقع (سوند كلاود) .. فقط وجدت الأغنية و ضغطت

علي (تشغيل) ثم إنسابت إلي أذني صوت منير من

جديد ..

>> الليلة الليلة .. الليلة يا سمرا << ...



نفس
دماغ

نص دماغ

رأيت أن الشعر فوق رأسي قد فاق طول أشجار الأمازون
و أن الوقت قد حان للحلاقة ، و بيني و بينك يوم
الحلاقة دة بالنسبة لي يبقي يوم أسود ، ممل ، و لازم
يكون حر ، صيف شتاء لازم يكون حر .. بعد ما غسلت
شعري عشان الحلاق ما يتلكش و يقول لي شعرك بوظ
المكنة .. توجهت مباشرة إلي الحلاق .. الساعة تقريباً
كانت 6:15 المغرب ..

قعدت زي أي مواطن عادي و بعد ساعتين من قراءة
المجلات اللي من 2008 و مشاهدة كل الكليات اللي
إتعملت من 1997 لحد 2007 علي التلفزيون جة دوري
عشان أحلق ..

سألني الحلاق تحب تحلق إزاي قمت قلت لة : زي كل مرة
.

و بدأ الحلاق في الحلاقة اللي كلها تحسيس علي راس
البنبي آدم منا ، و بعد ما شال الجنا ب و القفا النور
قطع ..

حبكت يعني ؟ جبنا كراسي و قعدنا برة بتاع نص ساعة
كدة .. منظري كان شبة البنطلون الكشمير .. راسي كلها
محلوقة ما عدا شوية الشعر اللي فوق .. و كل اللي يعدي
في الشارع ييحص عليا و يسأل في سرّة : أنا شفت الراس
دي في أنهي زريبة قبل كدة ؟!

و بعد نص ساعة النور رجع ، و كملت الحلاقة علي خير ..
و بعدها قررت أن لازم حل من الإثنين .. يا إما أشتري
مكنة حلاقة .. يا إما نضفرة و نخلص بقي !!!

اے جی پی



إجباري

كل شئ في البلد دي إجباري ، مفيش حاجة إختياري غير
سؤال قراءة ..

إتولدت في البلد دي إجباري ، دخلت مدرسة إجباري ،
لازم أذاكر و أدخل طب أو هندسة إجباري ، لازم أفرد
الفوطة بعد ما أنشف بيها عشان تنشف إجباري ، لازم
أمسح رجلي قبل ما أخش الشقة عشان " أنا لسة
ماسحة الشقة يا حيوان ! " ، إجباري إني معلش صوت
التليفزيون عشان طنط نوال اللي في الخامس .. إجباري
لازم " أتف غلي عمو يا حبيبي " ، إجباري أدفع حلاوة
للفراش لما آخذ النتيجة رغم أنوا بيكسب أكثر من تجار
المخدرات ، إجباري لازم أحضر طابورالمدرسة بقيادة
مدرس الألعاب اللي يشرب سجائر و عنده كرش كبير ،
إجباري أني أصحي الساعة 7 و وزير التعليم بيصحي

الساعة 11 ، إجباري لازم أخلص المقال دة مع أني مش
عايز !!



مشاكل الأفلام الأجنبية

مين فينا ماشفش فيلم أجنبي ؟

MBC 2 مين فينا ماعندوش دِش و بيتفرج بالساعات علي ؟

للأسف رغم إن الأفلام الأجنبية بتمثل نسبة ترفية كبيرة للمصريين - بجوار قناة التيت و الرقص الشرقي !- إلا إن الأفلام الأجنبية ليها تأثير كبير جداً علي المصريين - المصريين بالذات

الأفلام الأكشن .. (1)

من كتر الدم و القتل اللي فيها ، خلا المناظر دي بالنسبة لنا في الحقيقة مش مهمة .. عادية جداً .. لو أنت ماشي في الشارع و عربية خبطت واحد و حدفته مترين بعيد .. أنت مش هتجري عليه عشان تنقذوا .. أنت هتعض . علي الرصيف فطصان من الضحك

الأفلام الرومانسية .. (2)

فهمتنا أن أي قصة حب .. آخرها ورقتين عرفي أو تخلف
عيل و يتاخذ منك و ماتشوفوش تاني أو أنك تموت
بالإيدز .

الأفلام الكوميدية .. (3)

فهمتنا أن أي واحد معاة فلوس و كتب نكتتين ممكن
يعمل فيلم كوميدي (مش مصدقني ؟ أتفرج علي أي
(AdamSandl er) فيلم ل

أفلام الحرب .. (4)

فهمتنا أن معظم الحروب سببها أن واحدة ست غسيلها
نقط علي غسيل جارتها اللي في التالت

أفلام الكارتون .. (5)

فهمتنا أن الأطفال عايشين في نعمة و أن الدنيا لسة
 . (بخير) عند عمو ديزني بس

أفلام الرعب .. (6)
معاة في Vm p i r e فهمتنا أن كل واحد مننا متجوز
 . الشقة .

الأفلام الكلاسيكية .. (7)
فهمتنا أن زمان عشان تكون صايع و واد مخلص .. لازم
يكون عندك سواف أطول من مجدي الجلاذ



حياة الشعب المصري

الشعب المصري مختلف عن كل شعوب العالم ، مش بس
في العادات و التقاليد ، كمان أسلوب الحياة ، و الحاجات
اللي بيعملها طول اليوم .. فمثلاً ..

*الشعب المصري هو الوحيد اللي بيخش محلات وسط
البلد مش عشان يشتري .. لأ .. عشان يقعد في التكييف .

*الشعب المصري هو الوحيد اللي بيحاول يخس عشان
يقلل سعر التيشيرت .

Hi dden *الشعب المصري هو الوحيد اللي عندوا
Fol der s (طبعاً فاهمني) .

*الشعب المصري الوحيد اللي شرب الخمر عندوا حرام ..
لكن الرشوة حلال .

*الشعب المصري الوحيد اللي بينزل من باب الطلوع و
يطلع من باب النزول في المترو .

*الشعب المصري الوحيد اللي مش عارف الفرق بين
الCar t oon و Ani me (الأول 2D و الثاني 3D) .

*الشعب المصري هو الوحيد اللي عندوا إيميل علي
الياهو بأسم غير أسموا عشان يكلم الشباب علي أنوا
واحدة بنت .

*الشعب المصري هو الوحيد اللي عمل رهن للحاجة
الساقعة .

* الشعب المصري هو الوحيد اللي مصدق أن بوجي و
طمطم أخوات رغم أن بوجي قرد و طمطم أرنبه .

* الشعب المصري هو الوحيد اللي لما يجي يشتري جرنال
مياخدش اللي علي الوش .

* الشعب المصري هو الوحيد اللي يرفض ينشر الغسيل
لمراتة أو يشتري لها الخضار ، لكن فالح بس في شراء
قمصان النوم .

عن الموسيقى



عن الموسيقى

ظهر في 2009 ما يسمي بالإيمو و الميتال ، وكنت في الثانية عشرة من عمري أجلس أمام التلفاز أشاهد (معتز الدمرداش) و بجواري أبي ، كان معتز معة أحد شباب الإيمو ، صاحب حلقة شعر غريبة ، قال الشاب :

- يا أستاذ معتز .. حرية الرأي مكفولة للجميع ، و موسيقي الميتال هي نوع جديد من المزيكا الناس هتتعود عليه .

بدأت أراقب ملامح الفتى .. أرى تلعثم كبير و هو بيتكلم و شايف سواد تحت عينية ، قلت لنفسى - بعد إستيقاظ شارلوك هولمز داخلي - :

-الواد دة بيشرب حاجة مش تمام .

قطع حبل أفكارى صوت أبي يقول :

- الواد دة عامل زي عبدة الشيطان و العياذ بالله .. مالها
أم كلثوم .. أحسن 100 مرة من القرف دة .

ظلت هذة الجملة في أذني حتي كبرت ...

توجهت ميولي الموسيقية إلي المزيكا برة الصندوق ،
المزيكا الغير منتشرة ، و بدأت أسمع bands موجودة
في إسكندرية و ساقية الصاوي زي (مسار إجباري) و (
كايروكي) و (وسط البلد) و كل ما أسمع أغنية لازم
أشغل سماعات الأذن عشان أبويا ما يسمعهاش و يقول
لي نفس الجملة اللي قالها علي الواد الإيمو .

و في يوم من الأيام قلت لأبويا :

- بابا .. أسمع الأغنية دي هتعجبك أوي بتاعت فرقة
وسط البلد .

فيرد علي في غضب :

- لا يا أخي مبحبش العيال دي .

أنظر لة في حيرة و أسأل نفسي .. مش زمان كنت بتسمع
(حميد الشاعري) و (إيهاب توفيق) و أنت شاب .. طب
لية دلوقتي كرهت اللون دة من الموسيقى ؟ ..

يمكن بعد عمر طويل لما أشوف أبني بيسمع أغنية لفرقة
موسيقية جديدة أو لون موسيقي جديد .. ممكن أزعل لة
و أقول لة :

- وقف القرف اللي بتسمعة دة .. لحسان أنا مبحبش
العيال دي !!



جار الهنا

الحمد لله رزقنا الله بجار بسم الله ما شاء الله مطلع
عينينا ، عارف أنت زمان و أنت صغير في المدرسة كان
في عيال رخصة بتاخذ السندوتشات من العيال و تضربهم
، أهو عيل من العيال دي لما كبر بقي الجار دة ...

تقريباً و الله أعلم في ماسورة عندوا ضاربة (الحقيقة
هما ماصورتين واحدة في الحيط و واحدة في دماغه)
و الحمد لله المياة بتنشع في السقف و حولت الشقة إلي
كهف ..

للأسف مش هقدر أكلم الجار دة عشان هو ابن صاحب
العمارة ، و إن كان ليك حاجة عند ابن صاحب العمارة
قول لة يا سيدي ..

و ديماً لما تقول لة دة الرسول صلي الله عليه و سلم
وصي علي سابع جار يرد عليك و يقول :

- م أنا شايل الأستاذ أشرف اللي في (السابع) علي
كفوف الراحة زي ما وصي النبي !!!

فوائد الجار السي كثيرة رغم العذاب اللي يسببها لك إلا
أنوا مفيد في بعض الحالات .. مثلاً ..

*الجار السي هيخليك تعزل من العمارة و تقابل جار رذل
تاني و تبقي كدة و طدت صلة الرحم بينك و بين جيرانك
الردلين .

* الجار الرذل المتطفل اللي يراقب أهل البيت و هما
داخليين خارجيين ممكن تستخدموا ككلب حراسة لو في
حرامي فكر يسرق الشقة .

* الجار السي ربنا باعتها لك عشان تكفر عن ذنوبك بية .



هدية لأبوي
بمناسبة عيد الأم

www.egyptianart.com

هدية لأبويا بمناسبة عيد الأم

كل سنة و أنت طيب يا حج ، أنا عارف أن النهدا 21
مارس يوم عيد الأم و عارف أن النهدا مش عيد ميلادك
، مش عارف لية معمولوش عيد أب لية زي ما عملوا عيد
أم ، و لأنني عارف أنني في يوم هبقي أب و مش هيجيلي
هدايا ، قررت أنني أجيب لك هدية ..

معلش بقي ماما هتزعل شوية لكن ما باليدحيلة ، أنا مش
غني لدرجة أنني أجيب هديتين ..

بس أنا عراف أنك هتضحك عليا و تروح تدي الهدية
للحجة ، و لتجنب أي مقالب في بعض ، أنا قررت أجيب
الهدية السنة دي ، لمدام كوثر اللي في الثالث ...



مسرح العرايس في السن دة ؟

توجهت أنا و عائلتي إلي سور الأزبكية بالعتبة لشراء
بعض الكتب أودت بحياة تحويشة العمر ، بعد مرور
ساعتين كنت إشتريت كل اللي أنا عاوزة ، أبويا سأل
أختي : تحبي تروحي في حطة ؟

شاورت علي مسرح العرايس اللي جمب سور الأزبكية و
قالت : عايزة أخش مسرح العرايس .

طبعاً أبويا و أمي وافقوا ، و فضلت المشكلة ، أنا هعمل
إية ؟ أخش معاهم و لا أستنا برة ؟ مش عيب برضوا
واحد في سني يخش مسرح العرايس .. اللي في وشي
دة شنب و لا راسمة بماسكارا ؟

و للأسف دخلت معاهم ، قلت لأبويا : من الأول كدة أنا
هنام لحد ما العرض يخلص ماشي ؟

هز أبويا رأسه موافقاً بعد أن إلتقط لي صورة في
الخبائة و العرائس خلفي ...

بدأ العرض .. و قررت أن أغمض عيني في تلك اللحظة ،
و لكن ، شدني صوت العرائس حين بدأ العرض .. حين
كنت صغيراً كنت أحب مسرح العرائس أكثر من حبي
لجون مجدي عبد الغني .. فتحت عيني عشان أتفرج علي
(خمساية) من العرض ...


إستغربت جداً لأنني كملت العرض للآخر ، و كنت فرحان
فرحة لا توصف (واضح أن اللي في وشي طلع ماسكارا
فعلاً) .. لدرجة أنني كنت عاوز أطلع أتصور مع العرايس)
و يتحرق البرستيج) ..

و في الآخر أخذت بالي من حاجة ، مش عيب أنك تحب
حاجة بتاعت أطفال حتي لو سنك كبير ، قوم إتفرج مع

أولادك علي الكارتون (تجنب أي إنيمي ياباني عشان
بيجيب تخلف) أقرأ ميكي أنت و أطفالك ، شخبط علي
الحيطة براحتك (عشان كدة كدة مراتك هتقول لك:
عايزين نغير لون الحيطان عشان بقت أولد فاشون أوي)
.. ما تخفش من كلام الناس .. عشان كلام الناس ما
بيخلصش .. مضطر أخلص المقال دلوقتي عشان بتاع
غزل البنات جة في الشارع !!!

النهاية

Fi n



الكاتب

كريم محمد أحمد ، مواليد
1997 ، كاتب ساخر ..

نشرة :

- هاشتاج (كتاب إلكتروني
فشل فشل التنين)

-حقناً للدماغ (كتاب ساخر نجح و الحمد لله)-

-قصص بعنوان "سحس حظة كلة نحس" في مجلة
مصري الإلكترونية

- مقال يتيم في جريدة التحرير لم يقرأه أحد .

تنشرة قصص و مقالات علي موقع حروف

www.7roof.com

لينكات

صفحة الكتاب علي goodreads.com

<https://www.goodreads.com/book/show/22501988>

صفحة المؤلف

<https://www.facebook.com/elsenarest.karim>